


疏三釋
經氏
註十

法華經通義

卷十三
之十六

冊九廿



妙法蓮華經通義卷第十三

經文卷五中

明南嶽沙門憨山釋德清述

從地涌出品第十五

此品來意以顯自心發悟。恆沙性德現前。乃盡持經之妙行也。由前得記聲聞。雖願持經。自力不充。難入生死險道。要假他力。所以佛令菩薩調護。於心有所未安。今從他方來。有入恆河沙數菩薩。各願守護持此經者。世尊止而不許者。何也。以從外來故。宗門所謂從門入者。不是家珍。向自己胷中流出。方始蓋天蓋地。故云我自有六萬恆河沙眾。

從地涌出。體用雙彰。故眷屬同等。以此性德持經。方能妙契法身。故詣虛空。向二世尊。至此則生滅見謝。延促同時。故五十小劫。謂如半日。以此稱性成行。故四上首。皆以行名。意顯如此持經。方稱如來本懷。蓋由安樂四行成就所致也。以性德現前。殊非心識分別可知。故彌勒與八千恆河沙眾。皆生疑心。乃云不識一人。故與諸佛侍者同時請問也。此非小緣。故先勉以被精進鎧發堅固意。乃可信受。而如來自言。今欲顯發宣示諸佛智慧。自在神通之力。師子奮迅之力。威猛大勢之力。諸佛本

懷盡在於此。豈細事哉。然世尊告以此諸大眾。皆是如來成道已來。初令發心所教化者。故彌勒大眾皆起疑心。以眼見世尊成道四十年來所教化者。盡在靈山一會。而此地涌之眾。昔所未見也。且我等向蒙佛教。今尙如此劣解。而此大眾皆久植德本。深種善根者。何以少時化此多眾。故說父少子老之喻。以述疑情。此從地涌出。以顯迹妙。如來壽量。特顯本妙。以祛二乘執跡之見。以明法身常住。不屬生滅。故此品連壽量次第而來也。

爾時他方國土諸來菩薩摩訶薩。過八恆河沙數。於

法華通義卷一三
一
大眾中起。合掌作禮。而白佛言。世尊。若聽我等於佛
滅後。在此娑婆世界。勤加精進。護持讀誦書寫供養
是經典者。當於此土。而廣說之。爾時佛告諸菩薩摩
訶薩眾。止。善男子。不須汝等護持此經。所以者何。我
娑婆世界。自有六萬恆河沙等菩薩摩訶薩。一一菩
薩。各有六萬恆河沙眷屬。是諸人等。能於我滅後。護
持讀誦廣說此經。

此他方菩薩。願在娑婆持此經典。佛止而不許者。
佛意欲持此經。須在性德自足。不假於外。將顯本
迹微妙。以彰法身常住。不屬生滅去來也。故云。不

須汝等我自有六萬恆河沙等眷屬護持廣說此經也。菩薩之數皆以六萬言者。意表六識成智。則恆沙性德當下現前。所謂自性宗通妙用無極。若寄他六識。則落名言分別。非持經之妙。故他不足恃也。

佛說是時娑婆世界三千大千國土地皆振裂。而於其中有無量千萬億菩薩摩訶薩同時涌出。是諸菩薩身皆金色三十二相。無量光明。先盡在此娑婆世界之下。此界虛空中住。是諸菩薩聞釋迦牟尼佛所說音聲。從下發來。

此應佛所言。自有六萬恆沙之眾。同時從地涌現。其前也。言三千國土地皆振裂而涌出者。謂地本一眞法界。向以無明感結。故性德隱而不顯。今佛法音一至。則頓破無明。而自性全彰。妙悟自心。故恆沙性德總在心源。妙用無邊。如是則可持經。非他分別名言者比。故不須他方者此也。菩薩皆具佛相者。以德用無二也。以是本覺妙明心體。故身皆金色無量光明也。世界依法性空。故在此世界下方虛空中住也。以始覺有功。本覺乃顯。故聞佛音聲從下發來。意顯音聞爲教體也。

一一菩薩皆是大眾唱導之首。各將六萬恆河沙眷屬。況將五萬四萬三萬二萬一萬恆河沙等眷屬者。況復乃至一恆河沙。半恆河沙。四分之一。乃至千萬億那由他分之一。況復千萬億那由他眷屬。況復億萬眷屬。況復千萬百萬乃至一萬。況復一千一百乃至一十。況復將五四三二一弟子者。況復單已樂遠離行。如是等比。無量無邊。算數譬喻所不能知。

此言諸來菩薩各將眷屬多寡之不一也。謂所將者有齊沙數漸少至姦數。有姦數漸少至單已。而單已無眷屬者。又過恆沙數之多。意顯數量無窮。

且伴主之不同。體用之不等也。

是諸菩薩從地出已。各詣虛空七寶妙塔。多寶如來。
釋迦牟尼佛所到已。向二世尊頭面禮足。及至諸寶
樹下師子座上佛所。亦皆作禮。右繞三匝。合掌恭敬。
以諸菩薩種種讚法。而以讚歎。住在一面。欣樂瞻仰
於二世尊。是諸菩薩摩訶薩。從初涌出。以諸菩薩種
種讚法。而讚於佛。如是時間。經五十小劫。是時釋迦
牟尼佛默然而坐。及諸四眾亦皆默然。五十小劫。佛
神力故。令諸大眾謂如半日。爾時四眾亦以佛神力
故。見諸菩薩徧滿無量百千萬億國土虛空。

此言涌出之眾見佛之儀也。言各詣虛空向二世尊者。謂入法界空妙契法身也。種種讚法而讚於佛。如是時間經五十小劫。大眾謂如半日者。言深證實相入法界性。則延促同時。大經云。一念普觀無量劫。無去無來亦無住。所謂十世古今始終不離當念。了無延促之相也。四眾以佛神力見諸菩薩徧滿虛空者。所謂無邊刹境。自他不隔於毫端。以法界性空。無作妙力。非三乘可見。故假佛神力乃見也。

是菩薩眾中有四導師。一名上行。二名無邊行。三名

淨行。四名安立行。是四菩薩。於其眾中。最爲上首。唱
導之師。在大眾前。各共合掌。觀釋迦牟尼佛。而問訊
言。世尊。少病。少惱。安樂行不。所應度者。受教易不。不
令世尊生疲勞耶。
爾時四大菩薩而說偈言。
世尊安樂。少病。少惱。教化眾生。得無疲倦。
又諸眾生。受化易不。不令世尊生疲勞耶。
此言來眾上首問訊世尊者。親近隨順覺性之象。
持經以妙行爲首。故皆名行也。問訊之辭。言病惱
疲勞者。以見釋尊示現與民同患。且徵娑婆弊惡。

難可教化也。

爾時世尊於菩薩大眾中而作是言。如是如是。諸善男子。如來安樂。少病少惱。諸眾生等。易可化度。無有疲勞。所以者何。是諸眾生。世世已來。常受我化。亦於過去諸佛。恭敬尊重。種諸善根。此諸眾生。始見我身。聞我所說。卽皆信受。入如來慧。除先修習學小乘者。如是之人。我今亦令得聞是經。入於佛慧。

此如來答眾問訊之辭。正顯本之妙也。言此眾生。世世受化。則法緣已熟。供養多佛。則集福已厚。此證大通往昔之緣因。故今一見佛聞法。卽入佛慧。

是指上根利智之菩薩也。除先修習小乘者。今因聞此經。亦令入佛慧。是知佛化眾生。端在有緣。凡今不信。弊惡之人。未下緣種。故今重在持經。爲結將來之緣。所以如來汲汲求人。然所求之人。須是妙契佛心。深體佛行。乃能忍可。奈緣所以難得其人耳。

爾時諸大菩薩而說偈言。

善哉善哉。大雄世尊。諸眾生等。易可化度。能問諸佛。甚深智慧。聞已信行。我等隨喜。於時世尊讚歎上首諸大菩薩。善哉善哉。善男子。汝

等能於如來發隨喜心。

此來眾聞說化眾易度。故亦各發心。故云我等隨喜。世尊讚眾有隨喜心。善其法有託也。

爾時彌勒菩薩及八千恆河沙諸菩薩眾皆作是念。我等從昔已來不見不聞。如是大菩薩摩訶薩眾從地涌出。住世尊前。合掌供養。問訊如來。時彌勒菩薩摩訶薩知八千恆河沙諸菩薩等心之所念。并欲自決所疑。合掌向佛。以偈問曰。

此彌勒因眾騰疑。致問來眾之因緣也。言八千生疑者。顯八識未破之象也。謂此性德妙用。殊非識

心分別可知。故皆生疑。故云不見不聞也。彌勒乃
唯識宗師。知眾心念。故爲眾請決所疑。以偈問也。
無量千萬億 大眾諸菩薩 昔所未曾見
願兩足尊說 是從何所來 以何因緣集
此問大眾來集之因緣也。

巨身大神通 智慧叵思議 其志念堅固
有大忍辱力 眾生所樂見 爲從何所來
此見來眾表裏異常。不知從何所來也。

一一諸菩薩 所將諸眷屬 其數無有量
如恆河沙等 或有大菩薩 將六萬恆沙

如是諸大眾一心求佛道是諸大師等

六萬恆河沙俱來供養佛及護持是經

將五萬恆沙其數過於是四萬及三萬

二萬至一萬一千一百等乃至一恆沙

半及三四分億萬分之一千萬那由他

萬億諸弟子乃至於半億其數復過上

百萬至一萬一千及一百五十與一十

乃至三二一單已無眷屬樂於獨處者

俱來至佛所而問其數轉過上

此問來眾主伴多少不一也將六萬恆沙至億萬